



DEO OPTIMO MAX.  
UNI ET TRINO.

VIRGINI DEIPARÆ, ET S. LUCÆ  
Orthodoxorum Medicorum Patrono.

QUÆSTIO MEDICO-CHIRURGICA

QUODLIBETARIIS DISPUTATIONIBUS

*manè discutienda, in Scholis Medicorum, die Martii  
vigesimo primo Martii: M. DCC. XXX.*

M. THOMA-BERNARDO BERTRAND  
Doctore Medico, Præside.

*Utrum in Ascite Paracentesim tardare, malum?*

I.



UBULIS constat & humoribus corpus organicum. Ejus harmonia ab utrorumque motu pendet. Quâcumque de causâ è vasis contrâ naturam humor exeat, is vitatur, nisi resolutioni cedat. Fluctuat, suppurat, induratur humor, & tumorem facit. Multiplex tumor est. Vel à partibus, vel ab humoribus ortum habet. A duris partibus, ossium luxationes, nodi, exostoses: A mollibus, verarum omnis Herniarum species, ab Omento, Intestino, utroque; & Ventriculo, etiâ & Vesica. A quatuor humoribus Antiquorum sat bellè indigitantur tumorum natura, genus, indoles. Phlegmone à Sanguine: à Bile Erysipelas: Oedema à Sero: à Melancholico humore Scirrhus. Hisce si jungatur

partium varios humores excipientium varia conditio; innumeri alii constituuntur tumores. Signa, quæ ad curationis modum, speciem, tempusque ducunt, desumuntur ex læsionum varietate. Taxi, aut Incisione, curatur Hernia, quæ vera est: aliisque tumoribus tractandis, raro sufficiunt Diæta & Pharmacia. Plerisque curandis, ferro & igne plurimum præstat Chirurgia, tertia Therapeutices pars. Synthesi separata conjungit; Diæresi conjuncta separat; Exaresi intus superflua extrahit. Tres licet operationes discriminentur, ad perficiendum opus idem, haud infrequenter consociari amant. In teli extractione in corpus immissi; Calculi ex Urethrâ aut Vesicâ; Aquæ, Sanguinis, Puris, è quâdam cavitate; id probatur ultrò, liquetque in Paracentesi. Hæc, Latinis punctio, Exarescos est species, quæ eo peragitur temporis puncto, quo Diæresis. Continui separatione factâ, Superflui fit ablatio. Sed morbi tempus in quâcumque operatione faciendâ, debet eligi. Vel occasio, vel opportunitas curationis anima est.

## I I.

**HUMOR** quilibet extrâ vasa latitans, durâ mollive parte conclusus, nisi discutatur, arte educendus est. Ab ictu, aut casu violento, concutitur cerebrum: largâ tunc manu mittitur sanguis, vulneraria adhibentur. Hæc omnia sapienter tentantur initio: At imperitè, si sola, & funestè tandem; nisi sat citò derur via Trebratione, quâ sanguis, in pus flecti cereus, ejiciatur foràs. In Hydrocephalo, par operandi modus, cerebri substantiam humor modò non penetret. Empyema, sectione pectoris; Leucophlegmatia, tibiarum Scarificationibus; Hydrops oculi, Punctione; Ascites Paracentesi curantur: sed omnes ex opportunitate. Pus & aquam educebant veteres Medici. Sine ferro primum, exin cum ferro imponebant Cucurbitulas, ferramentisque candentibus partes exulcerabant: At curationem seriùs auspicabantur. Indè ex lentiori humoris eductione, ulcere diuturniori, miserè solvebat morbum Sphacellus frequens. Recentiores Medici, Suppuratos & Hydropicos securiori viâ, minori tædio, ac dolore leviori, sublevant. Scalpello, Lanceolâ, instrumento tandem Tricuspidè, aut Veruculo, cum argenteâ filulâ ex utroque extremitatis latere perforatâ, absolvunt opus. Qui Veruculo utuntur, rectiùs agunt. Integumentorum fibras separant, non secant acumine rotundo, citiùsque sanatur vulnus. Non ampliùs forsàn perficienda operandi methodus; sed nondùm perfectus operationum usus. Pleraque feliciores essent, atque Paracentesis, si tempore celebrarentur convenientiori. Medici est, non tantùm ea, quæ ante pedes modò sunt, videre; sed prospicere futura. In Lithotomiâ, absque maturâ preparatione sapientique consilio, necatur aeger. Aut miserè aveilitur, aut fingitur calculus; & pro salute mors est. In magnis vulneribus, aut cum, aut sine facturis; & ab initio, & ad animi deliquium extrahitur sanguis. Sic, quæ solito sunt Symptomata, cessant; quæ subsequi solent, præcaventur.

## I I I.

**VISCERIBUS** quamplurimis refertum est Abdomen, vitiis indè quamplurimis obnoxium. Hæc inter, varia sunt Hydropum genera. Horum contra naturam affectuum causæ, læsa sanguiferorum, lymphaticorumque structura; Viscerum obstructio. Tunicis vasa constant retium instar contextis. Quò sanguis diutiùs hæret, eò magis hiât tunicarum textura, diffilitque serum copiosius. Ligata in cane vena jugularis factum probat. Cutem inter capitique membranas & musculorum colli interstitia, serum diffunditur. Lymphatica, si absque rupture, dilatentur ultrâ modum; cystide conclusus aqueus humor magno crescit volumine, Hydatidasque procreat. Viscerum obstructio impedimenta

parit sanguini. Hinc hydrops, qui ab ictero, lethalis. Dissectis Hydropicorum cadaveribus, in Abdomine tumores varii, frequensque Scirrhus. Vitiato diutius fibrarum tono, Interpositis undique obicibus, patenteriores fiunt tunicarum pori, morâ ampliantur viâ procliviores. In Leucophlegmariâ venter intumescit, & corpus universum: In Tympanitide, tumet flatibus: In Ascite, sæpius Sero, Chylo rariùs effusio, solus primùm distenditur. Hydrops ille, quo, ut in utre, Aqua continetur, sedem habet eo in spatio, quod Peritonæum inter & Intestina vacuum est. Extremis levibusque digitis uno percussus latere Venter, in altero sensum præbet humoris fluctuantis intus. Aquosus ille tumor, retardatâ convenienti curatione, sensim increfcit. Abdomen præter, & Pudenda, & Femora, & Pedes occupat, totumque corporis habitum afficit. Jam vehiculo defraudatur purpureus latex, hæret ubique; & dùm diffusio latè sero immergitur machina, sanguis crassitie mentitur in vasis corallum. Ingruunt febricula, ut plurimùm urens; vehemens sitis; Urina admodùm pauca, crassa, lateritia; Spirandis difficultas; corporis superiori parte marcor; molesta Tussis. Tot lethalia Paracentesi præcaventur tempestivè factâ. Mochlica hic in casibus propinare, sanguinem est exprimere quasi torculo. Sic curati, sanguinis ictu repentino sæpè tolluntur. Asciti igitur vetusto nimis, vel recentiori, impar est Punctio. Aut jam desperatus, aut nondùm factus est, morbus. At, ubi primùm est vera certaue feri fluctuatio, constans Ascites declaratur. Hic, adhibitis incassum interioribus remediis, punctum est non procrastinanda Paracenteseos.

#### I V.

**D**E TECTO opportunitatis Momento, quis locus Abdominis perforandus? Peculiaris tumor, ab Hernioso, fluctuatione dispar, Punctionis locum notat. Alba linea si prominet, absque periculo pungitur. Umbilicus ob Exomphalon; Intersecciones tendinosæ, Rectus Abdominis musculus, propter difficiliorem Synthesim; Vasa sanguifera, ob Hamorrhagiam; ferro attingi nunquam debent. Tuta celebratur Paracentesis medio in spatio, quod anteriorem ossis Ilii Spinam inuicem & ultimam costam jacet. Decumbente agro in latus, non sedente; parte prominenti manibus Aquarum collectionis ergò compressâ prius, inibi hæud timide perforet Artifex. Perforatis Abdomine & Peritonæo, illas semper intestinis, retrahitur Veruculum: argentea Fistula, mundata prius, quâ eliciuntur aquæ, in foramine relinquitur. Intacto Peritonæo, nullus, negatâ viâ, vacuatur humor. Ideo alterâ Punctione factâ paulò infra primam, Veruculo longiori perforatâ tunc membranâ intus succingente; Aquæ fluentes, usque dùm spontè desinant, educendæ sunt. Unâ vice, veteres Medici licet reformidaverint, Humor emittitur. Quandòque tamen mucosâ quædam colluvies, Intestini Omentive pars, quid Pinguedinis ostia canaliculi præcludit, & fistulæ Serum. Obex faciliè tollitur: immittitur in Fistulam specillum, & fluunt Aquæ. Sub operationis finem, manibus Abdomen premitur paulò fortius. Ità exactius continentur viscera, exprimiturque serum. Missis aquis, tollitur canaliculus. Velnusculum splenio aquâ vitæ madido obducitur, & faciliè coit. Pendente à scapulis fasciâ firmatur interdùm mantile corpori circumcinctum: Hoc item, dùm eliciuntur Aquæ, adhibetur tutò. Per gradus ità compressis, & Diaphragmate, & Abdominis musculis, & Visceribus, præsertim Hepate, Lipothymia præcavetur à Respiratione læsâ. Eductus Humor, quid inde futurum, indicat. Cruentus, Purulentus, Fætidus, Chylosus, humore multiplici permixtus, mali ominis est: Boni verò serosus, lotio similis, non fæcens, non copiosior. Euchymis recrectur æger, iisque utatur, quæ Ascitis fomitem debellant.

**A**NTIQUORUM nonnulli, membranam Peritonæi inimicam Punctio-  
nis, Paracentesi spiritus excludi, Infirmari vires, Aquam jecinore affecto  
frustrâ emitti, pronuntiabant. At, Peritonæum, & in Gastro-raphiâ coalescit:  
Spiritus & vires non magis infirmantur, quàm in Phlebotomiâ: Affectus jecoris  
unius non vitium est; ex affecto splene, totiusque corporis malo habitu fit. Ina-  
nis igitur timoris est talis cautio. Timendum immò, si tardius expellatur flu-  
ctuans humor, morâ ne noceat diuturniori. Licet non semper sanet extractus,  
detecto electoque morbi tempore; in Paracentesi tamen una salus, Levat ægrum  
Aquarum Eductio; locumque facit Medicinæ, quam inclusus intus humor im-  
pedit. Asclepiades, Soranus, Themiso, alique, hâc curatione meritò adversari  
sunt Erasistrato, Evenori, Thessalo. Testantur sat citò factâ Paracentesi, non  
paucos evasisse; plurimosque, tardante consilio medentium, mori. Elatere Soli-  
dorum in dies magis debilitato, fibrarum fit Atonia. Perverso præpeditove mus-  
culorum Abdominis, Diaphragmatis, Pulmonum, motu: Excretiones singulæ,  
omnisque generis feriuntur vitianturque secretiones. Peractâ seriùs Paracentesi,  
prima citò redit morbi facies & aquosus tumor. Interrupto diutius serum inter  
& vasa commercio, nullus randem datur derivationi locus. Stagnat hebes hu-  
mor; serum corrumpitur; gravius læduntur viscera; vires confidunt; ad ruinam  
fluens totum redditur corpus; contingitque tabes, quæ Medicinam nescit. Vi-  
tium in substantiâ partium emendare, Nûm humanæ virtutis est? Quorum sto-  
machus jam corruptus est; Qui ex atrâ bile, aut obstructione, vel scirrho ve-  
teri in Hepate, Liene, Mesenterio, Pancreate; Qui malum corporis habitum  
habent, exhausti inedia; Qui, aut senes, vel à morbo jam vetusto, juniores li-  
cet, hûc deciderunt: Paracentesi fortè allevantur, sanantur nunquam. Quibus  
immò observantur iis contraria, illi sanari possunt, & plerique sanantur. Natu-  
ra vigens adhuc, Spontè, Diarrheâ, Urinæ fluxu, Metastasi, Ictu fortuito, Cri-  
ticam hanc aquarum egestionem molitur. Sic Medicina, Naturæ Imitatio est.

*Ergo in Ascite Paracentesim tardare, malum.*

#### DOMINI DOCTORES DISPUTATURI

M. Joannes Damianus Che-  
valier.

M. Emmanuel - Ludovicus  
Duverney.

M. Ludovicus Reneaume de  
laGaronne, Scholarum Pro-  
fessor designatus, & Regiæ  
Scientiarum Academia Soc-  
cius.

M. Claudius Brunet.

M. Ludovicus - Claudius  
Bourdeline, à Regiâ Scien-  
tiarum Academia.

M. Raymondus - Jacob Finet.

M. Ludovicus de Santoul.

M. Michael-Ludovicus Ver-  
nage, Medicus Regis ordi-  
narius.

M. Ludovicus Lemery Medi-  
cus Regis ordinarius & Re-  
giæ Scientiarum Academia  
Socius.

Proponerebat Parisiis, FRANCISCUS-JOSEPHUS HUNAULD,  
Armoricus, à Regiâ Scientiarum Academia & in Horto Regio Professor  
designatus, A. R. S. H. 1730. à sextâ ad meridiem.